

08 SEP 2001

SEA-Pembukaan (Ucapan)

SUKAN SEA KUKUHKAN TRADISI PERSAHABATAN

KUALA LUMPUR, 8 Sept (Bernama) -- Menteri Belia dan Sukan Datuk Hishammuddin Tun Hussein berkata Sukan SEA ke-21 yang bermula di sini hari ini akan meneruskan tradisi untuk mengukuhkan tali persahabatan di rantau ini.

Katanya, selama 42 tahun negara-negara Asean telah bersua, bersaing dan mengharungi liku-liku ini bersama dan berkongsi satu persahabatan yang tiada tolok bandingnya.

"Hari ini kita bertemu kembali untuk memperbaharui ikrar dan semangat kita kepada perhimpunan luar biasa ini," kata Hishammuddin yang juga pengerusi jawatankuasa penganjur Sukan SEA ke-21 pada upacara perasmian temasya itu di Stadium Nasional oleh Yang di-Pertuan Agong Sultan Salahuddin Abdul Aziz Shah.

Turut hadir Perdana Menteri Datuk Seri Dr Mahathir Mohamad dan rakan sejawatannya dari Thailand, Thaksin Shinawatra.

Katanya, walaupun kemenangan menjadi idaman setiap atlit, yang lebih penting ialah perpaduan melalui sukan yang menjadi jambatan kepada pertalian kemanusiaan.

Beliau berkata penganjur dan atlit telah bekerja keras menjelang sukan ini dan dalam masa dua minggu ini, hasilnya akan dapat diketahui.

Selain mengucap selamat datang kepada semua pegawai dan peserta asing ke Malaysia, Hishammuddin juga melahirkan penghargaan kepada semua pihak yang telah membantu menjayakan sukan kali ini.

Dalam ucapannya pula, Presiden Persekutuan Sukan SEA Tan Sri Tunku Imran Tuanku Ja'afar berkata standard beberapa acara telah merosot dengan ketara walaupun sukan itu sudahpun berusia 42 tahun, iaitu antara temasya sukan serantau paling lama di dunia.

"Malahan di Asia, kita merupakan rantau pertama menganjurkan acara seperti ini, satu bukti tentang kebijaksanaan mereka yang terlibat dalam bidang sukan ketika itu," katanya.

Tunku Imran berkata persekutuan itu sedar standard sukan di rantau ini tidak menunjukkan sebarang peningkatan sejak 1959, dan bersetuju supaya Sukan SEA dijadikan platform untuk atlit rantau ini meningkatkan pencapaian mereka ke tahap Sukan Asia atau Sukan Olimpik.

-- BERNAMA

AR MAI